

Usaha tubuh badan silat Asean dimula

oleh **25 JUN 1977**
KHAIRANI AHMAD

pencak silat
SINGAPURA dan Indonesia kini sedang mengorak langkah untuk menubuhkan sebuah persekutuan pencak silat Asean.

Kedua-dua buah negara itu dijangka akan cuba mendapatkan kerjasama daripada Malaysia, dalam usaha itu.

Persetujuan antara Singapura dengan Indonesia dicapai berikutan dengan kunjungan Haji Ya'acob Mohamad, Menteri Negara di Pejabat Perdana Menteri selaku ketua Persisi ke sana baru-baru ini.

Haji Ya'acob menandatangani persetujuan itu bagi Persisi sementara Leftenen General Tjokropranolo, Ketua Umum dan pengurus besar IPSI bagi persekutuannya.

Dalam satu kenyataannya, Haji Ya'acob berkata: "Kami setuju untuk mengusahakan bersama pembentukan Federasi International Pencak Silat dan Bela Diri.

"Kemudian pertubuhan pencak silat daripada negara-negara Asean, akan diundang untuk menjadi anggota federasi," katanya.

Dijangka, satu persidangan terdiri dari wakil-wakil pertubuhan silat peringkat kebangsaan dari tiga negara, Malaysia, Indonesia dan Singapura akan bertemu di Kuala Lumpur untuk membincangkan penubuhan federasi tersebut.

Ulangtahun

Menyentuh tentang Pesta Silat Kebangsaan yang kedua pada 6 Ogos ini sempena menyambut ulangtahun Persisi yang kedua dalam "Pesta Sukan Singapura". Haji Ya'acob menambah bahawa sebelas jenis silat akan dipertandingkan.

Pertandingan itu bukan saja untuk merebut kejohanan bagi tahun 1977, tetapi untuk memilih tiga regu terbaik bagi mewakili Singapura dalam pesta demonstrasi silat tiga negara (Indonesia, Malaysia dan Singapura) yang akan diadakan pada malam berikutnya 7 Ogos.

Kedua-dua pesta itu akan diadakan di Panggung Negara dan tiket-tiket berharga \$5, \$3, dan \$2 untuk malam pertama sementara \$10, \$6, dan \$3 bagi malam kedua dan peringkat antarabangsa akan dijual.

Malaysia dan Indonesia telah bersetuju untuk mengambil bahagian dan tiap-tiap negara akan menghantar enam orang pendekarnya serta dua orang pegawai masing-masing.

Indonesia juga bersetuju untuk menamakan dua orang pegawainya bagi menjadi pengadil di peringkat Kebangsaan Singapura.